

意苕山館詩稿

意茗山館詩稿卷十三

元和陸 嵩希孫著 男懋修九芝校

甲寅

元日得廬州陷賊中丞江公

忠源

殉難之信

去年元日京江口驚聽武昌告失守今年元日胥江頭堅
城又報摧廬州廬州中丞誓報國自練精兵戰必克彷彿
當年背鬼軍要當盡殺黑山賊哭聲動地方金陵烽煙日
夜江邊騰斯民水火欲誰出旌旗惟望來中丞傳聞中丞
有長算指揮便擬清江漢豈料驚雷地底回莫教鐵騎城
頭扞中丞忍死猶大呼從我殺賊真丈夫須與畢命豈有
愧日光黯黯風烏烏誰擁重兵膽驚裂一死甘心讓公烈

可獨廬江萬戶哀東南從此長城失
嗟乎東南從此長城失更望何人賊同滅

春寒

驚心已過元宵節雨雪紛紛祇自憐
天意亦知人意改不教春色似年年

與友人夜話

典盡寒衣雨雪驚無聊還與坐深更
傳來消息愁難遣話到艱危憤得平
舉目星辰非舊日傷心書劍誤平生
酒酣莫效聞雞舞越石何勞問北征

書浦二田存義編後

倉皇行篋無一書麋鹿與遊木石俱
胷懷刺促那可說歸

得此卷歡何如挑燈不厭百回讀坐令終夜生悲吁先生
抱負比管樂生逢鼎沸潛邱墟諒無人倒蔡邕屣焉用自
棄終軍繻知人豈意有經撫各齋書幣來邊隅滇黔閩楚
徧馬迹幕中經畫傾元瑜削平寇盜靖黎庶勲在史冊名
非虛平生所學庶不負功成身退歸蓬廬誰云教官盡迂
腐不遇郡怪輕侏儒上杭門人紀斯編傳之百世應無渝
豺狼滿地感今日手無寸鐵誰能驅

苦雨

人愁天亦愁風雨苦不休積雪且未銷淒氣增昏眸自非
閭閻怨散布不得收何乃雨月來白日成冥幽念從兵戈
起殺戮歲幾周白骨暴道路碧血流渠溝到處聽鬼哭有

若荒墳投天戈痛誰挽逍遙任豺貅狂羆況四塞欲撥知
何由安得訴上帝一怒誅蚩尤陽光庶重照瑞靄騰奎婁
不然玉潢倒陰盛真堪憂

寓孥吳江以避潰兵書此志感

潰兵自東來所過肆剽掠真義唯亭閒哭聲動林薄婁齊
當其衝居民盡驚愕官吏不能制但急下城鑰不惜捐輸
錢分給恣淫博入市仍持刀歸營肯遵約豈竟無王章何
乃過示弱深恐啟姦心亂將自此作故里雖可戀近市要
非樂暫從范蠡湖聊借一塵託

金壇示曹二香

不分重相見傷心患難餘乍看疑夢寐欲語轉欷歔幽憤

嵇生賦懷沙屈子居此身如未死何敢託樵漁

丹陽遇楊子城

不須相見說相思回首江頭獻策時
豪氣肯隨流水逝傷心惟許短檠知
吹簫有客容求食橫槊何人獨賦詩
等是無家歸未得飄零休恨寄書遲

無錫夜泊

風塵徒役役漂泊竟何成
世豈憐張儉人誰識禰衡
關河空目極烽火自心驚
愁絕梁谿路扁舟此夜橫

寄家沈子鬻

熊師

茂才宅追悼其先甫子實明經卽

題余所居聽蛙谿舍壁以志謝

近來心事如蛙癡
向人聒聒人厭之
祇應雨後自鼓吹
底

煩入耳分官私先生聽此有偏愛築館坐臥留清詞

著有聽蛙

谿舍

我來墓草恨已宿追隨風雅孤當時殷勤深感後賢

意掃除容我全家攜複壁雖殊趙岐託牛車已免王尼悲
世情浮薄那可道高誼直欲齊雲霓何當風塵掃一夕釣
竿營得長君依

楊漱雲

炳泰

孝廉招飲

不期北海羣賢座得厠夷門涸迹身意氣一時成感激艱
難千古話酸辛當頭莫散公超霧到眼徒障庾亮塵寶劍
酒酣勞數看因君那不淚沾巾

過趙季梅

彥修

吳江學舍夜話

同是無家客相逢一倍親語多愁夜促坐久忘交新慷慨

知違俗艱難未諱貧不因離亂後那識性情真

與俞少甫

岳

黃沙莽莽天昏昏出門四顧無行人兵戈滿眼欲何適一

帆直挂吳江濱吳江故人半存沒存者遠遊隔吳越

謂吳子甫

知君養疴獨閉門驚喜相逢感契闊陂塘五月涼如秋蛙

鳴聒聒生煩憂窗前雨聲聽不住欲語涕泗先交流憶昔

燕臺共獻賦聽鼓金沙復朝暮廿年蹤迹堪重論白髮何

能更變素嗟余慟哭圖山東君亦寇亂婁江逢流離徧野

忍相看一身何惜隨飄蓬報國誰聞誓滅賊血作流漸骨

作石行路時愁鬼哭哀此生再見知何日吁嗟乎此生再

見知何日終望紫氣回北極

俞少甫招登挹秀閣

蕩槩出北門延塘聳傑閣扶杖來故人招我共履屨開窗
見青山雨過靄添薄曲曲環湖流綠意浸簾幕秀色真可
延挹取忘日落三載費經營引勝盡巖壑無事此燕游襟
情足開拓想見清平時魚鳥亦知樂觴詠傳風流倏忽已
非昨我來強登臨俯仰欲安託

紀張繼庚吳長松事張爲上元廩生吳則販絲爲業
者同謀殺賊事洩而死從死者數百人時人比諸
瓜蔓抄爲詩以哀之

上元諸生張繼庚志存忠義素有聲城破降賊賊豈識披
執肝膽誰平生正氣乾坤尙如昨亦有英豪市塵託刎頸

自結張陳交同心誓共孫盧縛旌旗夜偃風颼颼鼓聲欲
死天亦愁蠟丸屢煩達聞道鐵騎未報來江頭謀洩徒驚
博浪索分裂五體未爲酷賊輟裂張體傷心復見瓜蔓抄遺卵
那完鳥巢覆身死名滅彼何人如君毅魄知常存紀年甲
寅月戊辰此事藉藉非傳聞

長歌行

君不見屋上烏朝朝暮暮向我呼識何凶事爲我報血流
口吻忘其痛又不見門下犬見我搖尾作牛喘使我一月
不出門勞爾狺狺夜深伴人情得盡烏犬如焉用行路生
悲鳴狐狸滿市鼠滿室食人豈獨防豺貙

喜聞勝宮保自臨清追賊至豐縣盡殲之信

一戰功成七十城勝家原是敗家兵汾陽雪涕收京日渭
水沈舟破敵情軍令自知嚴霸棘捷書爭報動幽并策勳
莫便平臺召猶有江南賊未平

復將攜家之陳湖紀感

擇里不處仁智者笑嗟嗟松陵三月居患難感同卹相要
東西鄰雞黍復我設少長看彬彬進退皆有節蹤迹非素
親厚誼比膠漆念古稱桃源豈真世途絕諒由風俗厚遂
若囂塵失漫疑此中人獨見秦時月我雖去陳湖暫樂煙
波闊終當釣竿營歸向虹亭拂

留別沈望溪

千萬買鄰百萬宅此意今人那得識我雖寓居感主賢三

月已忘身是客一門長者稱望翁愛我尤時露肝膈深憐
轉徙囊橐空便擬東頭屋教析分金指困安足奇君儻多
財庸我惜相看羣從皆難忘高誼何嘗讓古昔癡頑方愧
伯道兒過從亦復蒙朝夕交雖非舊情自真世正多憂感
同激人生聚散原偶然梗斷蓬飛豈終極陳湖煙水看蒼
茫非是蓬瀛遠難卽但得風塵江上清終教離思尊前釋
一笑子孫長隔牆高風定許追元白

陳湖

聞道湖波甫里連家風我欲問前賢筆牀茶竈知何處一
賦傷心誦自憐

烽火回頭望欲微綠波深處見危磯一聲忽聽魚父響還

道中間有殺機

曝書

迂儒少所嗜性命託卷軸恐復兵燹遭荒村預度閭今來
載與俱鉅細定幾簏別久如良朋重晤快拭目霉變得未
曾經積已寒煥抱置烈日中蟬蠹自驅逐稚孫雖愚頑著
手勝僮僕編排喜無訛他日或能讀獨嗟兩年來全家值
傾覆漸慮逼飢寒難免付典鬻念此心靈傷淚下欲簌簌
敢比南阮貧歲歲高樓曝

題朱雪泉徵士錦谿漁隱圖

滄溟急怒颿長鯨浪驚跋何處容安流錦谿指遼闊非獨
水淺清纖埃自然絕中有隱君子眼明謝簪紱楓葉荻花

閒孤艇任出沒一竿手自持危磯坐終日所嗟淵濫時四
面網張密那更白小餘潑刺跳波活羨魚雖無心竭澤豈
忘恤古今幾釣徒俯仰世愁閱我未冒風濤夢魂尙顛越
甫里湖宗風千載讓君說

家輪香

雲梯

茂才索題先甫松濤先生坐花醉月遺

照

浩然對月愁不寐子美看花感濺淚千秋花月豈有私人
生幾見能歡會君家先人繪此圖興高正值春光媚坐中
羣從皆能詩分韻深宵兀忘醉香風淡宕回酒尊皓影湛
濛溼衣袂掀髯佳句繞闌尋行炙炙奴觸屏睡今雖仙去
迹已陳韻事爭傳尙海內想見當年全盛時文采風流重

前輩一時題詠多名流展卷琳琅發光怪我來烽火正蒲
天那勿逢君動感慨

江上曲

莫道風波惡年年阻客舟只愁江上水不肯向西流

次和湯雨生協鎮絕命詩韻

一詩傳絕命浩氣自千秋殺賊誰同誓臨危恥異謀故交
憐我在老淚爲君收報國知無愧從容豈怨尤

汪彥卿

俊

以詩相質題贈

言爲心之聲卽言心可證豈有放蕩詞出自嚴正性吾子
雋雅才聲名久吟詠虛懷乃相質毋乃竇聽瑩我詩未窮
源稍知別雅鄭慨自性靈託簫鼓負名盛譬如散狂藥四

海飲同病拔之務蹇澀矯枉又過正讀君冰雪篇所趨諒
有定願更清廟竚交和切笙磬根心以聲聲百慮自退聽
興觀與羣怨聖言敢持贈

旅館偶書

消磨憂患感淒暄風景何堪想故園杳渺煙波愁窟宅蒼
茫雲樹變川原深宵獨客蛩初警盡日無人鳥自喧但使
歸與能早賦便應到處有桃源

秋夜

陽春已再經炎夏亦兩遇此身尙無歸抑鬱欲誰語昨夜
金飈來輾轉動百慮願爲雲中雕長風不我御鯢鯨翻海
濤欲掣手無具祇應和百蟲宵深訴絮絮攬衣步廣庭仰

望天未曙風浪滿銀河明星動欲雨何能揮天戈扶桑挽
羲馭朗照消晦冥高縣布和煦豈獨霜雪苦踐履免麻屨
道在吾何憂天地本旅寓

見雁

銜蘆非復似年年繒弋驚心正滿天嘹唳一聲聽不得飛
飛還欲向誰邊

寄楊子城西石潭

端憂正多暇思君彌耿耿風塵見知難枉書感重省上言
寇勢窮下言道無梗轉徙望秋來漸可返閭井魂夢紛徘徊
悲欣默交併云何逾三伏消息斷鴻影風雨忽連宵淒
氣散遙嶺墜葉響微聽胡能不心警

精衛

微禽有精衛飛飛口銜石誓填滄海乾哀鳴血流豎鷗鷯
笑雲端逍遙振長翮浮雲方迷漫二曜蔽昏黑狂瀾日滔
滔蛟螭盪窟宅夙恨焉得捐千載此朝夕閔之或媧皇天
地豈終極

爰居

爰居海上來大饗設鐘鼓羽族競相慕呼羣徧中土上聞
日月光下爲道路苦搏擊非無禽飲啄誘共處鸛鸛嚇相
避燕鶯復何數安得魯東門先與逐所主席幾天宇清干
戚刑天舞

鸛鵒

有鳥鳴咻咻不知是何族其來自南溟疑亦爰居屬高飛
託風雲倚媚此攫肉飲河異鱗鼠所欲但滿腹引類肆聒
喧不祥雜鴟鵂冥心嚇鵂雛播弄恣翔宿不亟毀其巢懼
貽魯公辱

欽鵂

梧桐不棲鳳止宿來欽鵂欽鵂結鵂鳥帝旨曷敢違黨羽
聚海島肆毒來江湄竄窳與鵂鵂相引助其威飛爲鵂鵂
愁潛爲鵂鵂悲鼓翼久不去匪獨城邑災上天望垂閔誅
之崑崙隈

詠二鼠

昔有雙鳥今二鼠雙鳥不鳴已千祀二鼠乘亂肆齧吞日

夜啾唧鳴不止初曾盜食御廩粟狡黠不與凡鼠似一鼠
竊鹽身故肥一鼠餵豆羣受使哀哉蛇豕方乘墉麀隼無
能犬畏死欲保城社一技無鬻熱賣寒但鼠恃倒翻盆篋
人盡愁拱立衣冠爾不恥爲害豈獨牛馬膚自殘爾類利
爾齒毋怪江東呼作狼莫忘敗穴灌以水餘肉纍纍知何
爲貪黷從來出都市

閏七夕

不分今年兩度看銀河依舊隔漫漫謝他辛苦填橋鵲如
此風波渡亦難

聊自遣

漫道崎嶇世路艱物情本愧未能嫻懶遲報札交忘淡食

少遺縑迹近慳避弋孤鴻何處宿失巢旅燕幾時還栖栖
休更逢人訴有淚西風祇自潸

謁三賢祠呈輪香祠本輪香先世所建祀吳郡始祖
漢豫章都尉伯元公配以唐相忠宣公贈補闕甫
里先生甫里爲輪香所自出祖余則忠宣後裔也
瞻仰之餘聊志木本水源之感

江頭忠烈我祖祠

潤城有宋右丞
相忠烈公祠

我曾慟哭知不知漫天

烽火欲何適涕淚又爲三賢滋三賢何人亦我祖都尉喪
歸葬吳土貞元宰相真忠臣江湖散人並千古几筵奔走
陳湖邊丹楹刻桷知何年相逢宗裔爲我說構造猶記康
熙前康熙迄今二百載世事紛紛幾變改春秋俎豆雖依

然前輩經營問誰在吁嗟衰盛原循環滄海亦見桑田遷
何緣祖孫聚一室漢唐彷彿猶人閒我來瞻拜動歎息奉
祀看君髮今白耕讀無慙世澤縣衣冠未許時流識躑躅
祠旁淚獨吞遭逢喪亂堪同論豈知乞食吹簫客亦是三
賢老子孫

徙居金澤留別錦谿諸君卽以志慨

錦谿接金澤計程不逾時非必勝林壑可爲游覽資所喜
賃廬值稍廉力可支徑起具舟楫便與鄰里辭鄰里雖不
多未免傷別離人生聚散緣亦復誰能知念從喪亂來倏
忽已再期遷徙久無定八口擲免飢紛紛彼何人廩祿還
虛糜至今曲阿北日夜仍鼓鼙有謀竟不用歌哭知皆非

西山望何處終當去采薇

宣公墓柏重青圖爲家雪亭

日愛司馬題

柏圍丈六尺四寸高四丈有奇久成枯幹乾隆中北向
一枝忽重青吾宗甦菴太守繪圖徵詩傳爲盛事不知
何時爲婁水寄園主人所得後又入郡人瑤圃家今歸
雪亭輾轉藏弄不出陸氏其亦宣公之靈實呵護之與
雪亭重爲勒石作此以紀其事

武侯廟前柏參天經歷興廢逾千年霜皮鐵幹色未改詠
歎往往傳詩篇我家宣公輔唐室勲在青史人知賢忠州
一謫遂不返際會已感貞元編何致森森墓頭柏柯葉亦
異成都全神明造化豈無意北枝忽見青重延路人瞻仰

盡驚歎子孫那弗興留連自古盛衰本相繼循環理數原
無偏根之既盛葉斯茂何獨一木微薤薤江東後裔近非
昔重振或者機其先繪圖徵詩感吾族寶貴應未殊瓊璇
此事尙在乾隆世人謝代易圖隨遷收藏展轉幸默佑未
經他氏銷雲煙一朝落我雪亭手欲傳永久貞珉鐫我祖
神靈庶憑式先澤應讓君家絲獨嗟我老遇世變流離遷
徙哀江邊毀傷薪木諒誰禁心知失職原多愆上慙忠宣
下清獻兩廡回望空几筵今來訪君見拓本益令嗚咽言
難宣敢將家國無窮恨雪涕憑君寫此牋

酬胡海霞

其炳

茂才

世事日顛倒是非誰得知之子獨湛然寸心了無私固知

千載上抗懷自有師念彼昏妄徒胷本無妍媸因之昧黑白何由辨雄雌釀成此禍亂岌岌將誰持自非古賢哲挺生復今時法令破一切教化更亟施安得舊汚俗壹變還純熙抱此欲語誰四顧生涕洟嗚呼今與古世異人豈非君雖坐田閒寤寐深瘡痍弓旌苟見招解褐辭窮扉焉知藹然氣不足銷鼓聲我老復何爲慰勉慙孤羈一詩感持贈什讀懷心脾

冬至舟中作

月過二十日六百幾日不作舟中客驚心冬至又今朝漂泊依然說不得偶然繫纜荒村旁側聽有人自歎息夫死從軍子未歸一杯那得重泉滴吁嗟乎一杯那得重泉滴

缺祭吾方感今夕

江南北賊久未平忽聞曾侍郎

國藩

連復楚中郡縣

悲喜交集

風鶴頻驚尙八公忽聞捷奏楚王宮
巴陵月落烽銷黑漢水流平血染紅
木筏竹籤憑縱火長龍巨蟹侍郎所用快戰艦名

乘風何當絡繹江頭騎飛報樓船一夕東

訪吳野人吳名奎順常州人以治骨角爲業憤賊未滅仿紙鳶傳書法製飛礮欲獻當事盡焚賊巢而無應者慷慨語余余高其義而哀其志作此詩以贈之

偶然入城市道逢吳野人野人何所業骨角治共聞自言

無他願藜藿甘長貧所憤三城賊殺戮不可論流血徧郊
野暴骨連衢闔豈無桓桓眾效命如虎賁胡爲兩寒暑天
討猶未伸遇我意感激豪氣凌寒雲謂有飛礮法蟻賊可
聚焚便欲邀我去試辨假與真我聞起相謝身賤敢具陳
請看兩芒屨日夜江關奔有懷欲誰訴亦是聲潛吞願君
效明哲且自保厥身毋使泚泚統徒誚手不龜歸來感無
已白日堪常昏嗚呼忠義士恆必泥塗淪豈獨千載上慟
哭思夷門

寄家輪香

暑寒驚再更滿眼尙鋒鏑昨者來陳湖旁皇少人識相逢
同宗賢兩心頗莫逆所知雖未深真意覺充塞自言守蓬

茅城市遠足迹先人有遺書伏誦自朝夕問年逾杖鄉曾
未見兵革何意鼙鼓聲忽聽江頭急閱我居危城隻身幸
早脫非有尺寸權那能手擊賊躑躅空軍門陳書屢遭斥
拂衣復何之慟哭圖山側流離積經年妻子有飢色慰問
勞頻頻展轉動感激風化歎久衰世途愈逼迫非無平生
親類若道旁客虎狼況未驅白日正昏黑告訴知無門死
亡救焉得葛藟詠風詩獨君念彌戚此誼豈今人慨然想
古昔所悲人事乖風塵苦難息結鄰願終虛懷抱更誰釋
離別徒惓惓一水望遠隔風雪聽蕭騷思君意何極

歲暮雜感

驚心何處不烽煙南北相望路幾千敗驛荒亭淹白日餐

風虐雪作殘年一生懷抱更誰向四顧流離還獨憐此夕
可堪茅屋底孤燈無燄對愁眠

芒屨奔走徧江湖回首登程盡畏途名姓竟同張祿未衣
冠還識管甯無何緣喜見牆頭鵲到處愁聽屋上烏幸得
有人縣榻待此來豈獨爲蒹鱸

渺渺湖波帶夕暉金昌亭館望依微早空杼柚供團練欲
竭脂膏餉飲飛挾彈探丸愁未已轉芻輸粟事全非尋常
來往官塘路容易全家載得歸

鷓鴣啼怨自春秋蹤迹萍蓬祇獨愁不爲關河成喪亂可
堪風雨有句留松陵月落曾停屐陳墓湖平記放舟舊侶
新知都別恨爲誰扶病一登樓

北斗南箕幾度看風聲還挾角聲寒歌傳易水魂猶壯夢
繞夷門淚未乾舊日弦歌同調盡他鄉生死隻身拌此情
欲共何人訴目斷滄江路渺漫

毘陵帶水接蘇臺曾此談兵一權來保障何心功自敘驅
除有願愧非才嚴城不啟西風緊戍壘重登落日哀太息
故人今宿草出關那弗更徘徊

曲阿西去路冥冥惆悵經過雨正零白骨亂堆新舊壘青
燐低引短長亭篋中殘破英雄傳袖裏模糊山海經悽絕
空庭看夜夜幾時弧矢直狼星

驅馳依舊任戎車往事追思涕淚餘馬援據鞍空聚米楊
安曾繪潤州陳琳磨盾枉傳書楊子城與功名一代歸傭

山川圖送營

愁兒事

功名一代歸傭

估忠義千秋奮棘鉏爲報丹徒諸父老此身拌得付溝渠
長江滾滾下寒潮天塹從來話六朝卻憶相陪崔郡守可
應還問漢票姚終宵鞞鼓聽猶急他日風塵恨未銷誰信
書生能報國滇南萬里路迢迢

崔公光笏守那時亦謂
洲兵可用今觀察滇省

餉匱兵驕事可知中流擊楫更誰思縣車北固都成帳飲
馬秦淮竟作池但使蠻夷還絕徼豈煩頗牧更同時如何

滬濱城邊路一任輪船上下馳

黃埃莽莽凍雲昏極目河山總愴魂草木變衰愁更數蟲
沙淒切化休論旂常勲薄朱提貴鈇鉞權輕令甲尊留得
是非青史裏千秋哀怨自長存

相逢休便賦同裳世變紛紛祇黯傷抱負幾人思管樂從

橫有客自蘇張關津寂寞潛狐兔城郭淒涼聚虎狼四海
無家成一哭牛車轆轤送斜陽

連天劫火尙昆明薪水何須問武城賈誼有書成感激申
胥無淚灑從橫吹簫今日原知賤擊筑當年豈爲名便欲
盡刪游俠傳不教慷慨誤平生

漏聲寂寂柝聲沈雨雪更番歲月侵書報親朋無好語路
窮僮僕有離心蘭成短檠身南北子美扁舟事古今不到
襄陽問耆舊豈知梁甫有高吟

顧影淒然兩鬢皤茫茫身世竟如何憂讒肯信銷金易論
事徒悲鑄鐵多坐甲裹糧仍日夜絕河斷港亦風波故園
風景知非昨戎馬何堪更屢過

意若山館詩稿

卷十三

六

得歸閒道尙爲人皮骨空存歎此身待拂旌旗回日月更
移劍佩近星辰垂流願已孤縈網厝火憂仍看積薪門戶
傍他驚歲晚桃符休換一番新

意若山館詩稿卷十三終

孫潤庠曾孫家振校字

意菴山館詩稿卷十四

元和陸 嵩希孫著 男懋修九芝校

乙卯

元日偶書

衣冠不著杖休扶
隨意詩牋墨亂塗
黏向壁閒憑客看
便應算我歲朝圖

上海

乘亂姦商聚傷心
此盜兵嬰城經兩載
浮海忽三更捷遂
連營報人還盡日
驚華夷看雜處莫
道卽承平

人曰

鼓輦聲裏記迎春
拌得溝渠付此身
忽看泥金傳帖子
始

知今日又逢人

家雪亭招飲

芒屨踏破江頭路歎息有懷欲誰訴非關世事多變更自
悔生平讀書誤感君念我庀運遭此身正未知朝暮本無
紓難於菟家妄效登城倉葛呼聒耳休怪人共迂哆口那
免世交忤不見烽煙瀟瀟城潛銷忽報隨雲霧底須修甲
同仇歌會看論功捷書布凡事成敗俱有天況乃安危罔
非數我聞真是夢乍醒明朝便擬君齋赴有酒且復一頽
然僵卧安用知其故

代簡招胡海霞小敘

相逢休厭往來頻放眼如君有幾人草具亦知難供客今

朝應識老夫貧

驚聞蘇城戒嚴事定後作

謠傳上海賊分竄及蘇郡此事固應防虛實豈須問自從
粵寇起所至痛蹂躪大小數百縣剽掠免知僅蘇城號富
饒商貨聚琛寶賊涎久共垂待時未有釁近看市廛閒土
販雜充物招邀更博徒棚席處交溷肆凶不避官游行恣
挾刃此輩從何來不除禍轉瞬倉皇際今朝正恐暗思奮
鎗鎗但六門鎖禦令亟徇閭閻豈遂安勦撫兩休論所望
金焦西樓船下飛迅撻伐威大張餘孽盡一燼庶幾懷王
章歸業各安分不然虎狼凶迹未深山遯逞毒敢便忘罷
鬪獸雖困輾轉杞人憂傳聞望誰信故鄉歸何時昏眼歎

空技

寄董竹初甥

乾坤轉無期歲月逝肯再流離心暗驚兩見暑寒代念我
知何人切切永寤寐傷哉我同氣存者僅一妹路遠見本
難遭逢況顛沛一書憶昨秋慢滅認紙背心知必我甥未
識我所在輾轉託誰何幸竟入我袂開緘忍細看語少我
不怪但欲知存亡豈暇問瑣碎草草述母意一字真一淚
平生寡兄弟此痛識誰慰可憐老病身奔走尙無賴江頭
鼙鼓聲驚聽又改歲何時得銷兵重令返征旆平安報汝
知期汝復來會近知汝讀書俗學頗能悔經史抱日夜聖
賢樂晤對胃懷多古人超異自流輩我雖憂患中聞此亦

大快報書恨窓窓窮鄉少人賁達否誠莫知相望祇增慨
復此一告存風雨感瀟晦藉汝語二親眠食姑各愛

懷潤城諸子

平時來往二三子一別茫茫判生死不因今日見面難却

悔從前等閒視就中難忘尤二楊彭齡殺賊江頭尙共矢

劉生暹一櫓來蘇州慰勞殷殷語不止逢人問訊還曹爾

張春第患難相憐更嚴允李德今皆不見可奈何有夢何能

越江水幾度丹陽聽礮聲依舊豺狼滿城市牙旗玉帳知

何爲坐甲裹糧只如此近聞楚北賊盡平更報山東寇全

靡堂堂天上眞將軍指日南來心大喜又恐傳聞或未眞

自禱空庭夜數起便擬京江尋故人徑向門前舟楫理京

江雖非我故鄉居久亦得桑梓比況是詩書琴瑟旁嘯歌
無閒雨風裏安得妖氛一夕銷執手重教訴瑣尾聊復臨
風寄數行擲筆仰天歎無已

哭周僕

聚人成宇宙所繫惟一情誰能死生際漠然如平恆我家
有老僕周姓馥其名性愚不識字服役頗樸誠侍我二十
載夷險無變更自我奉官檄涉江募洲兵爲我守行李隻
身居東城賊來忽如蟻殺戮看從橫閉門不肯去頸幾遭
其刑幸免急奔告傷哉此餘生我時罷徵召躑躅方郊垌
勉強爲慰勞涕泗紛霑纓官軍望日夜亟予驅鯢鯨如何
兩改歲寰海仍未清轉徙痛靡定道路時各驚勞苦積日

久百病汝躬嬰尙思撤防成爲我歸裝營豈遽忽今日精
脫亡隨形驚看更何道急遽囊愁傾草草爲棺斂喚汝肯
重膺汝雖有兄弟道遠喪誰迎姑留義冢側待我辭荒荆
汝魂儻可招定與汝同行所嗟今年來衰病我日增此願
豈竟遂但自呼蒼冥嗚呼死別慘豈非人重輕況同處憂
患僮僕猶親丁扶杖起相送那免一失聲問年正乙卯月
寅日逢庚紀汝死亡候聊以慰汝靈

家輪香饋米寄謝

彈鋏性所恥珠履戒輕販奈遭喪亂來日食苦不給感君
頗我憂失身或簞篋遠致米一船得比珠萬粒家人盡歡
喜僮僕亦嗚咽念彼江頭路兵戈未休戢滿眼看流離充

賜少升合獨飽我何安此心那自慊君況非素封推食能
徧及慨然效指困誰謂但周急此誼感勿設真欲肌髓浹
作詩愧古人敢比乞米帖

抽釐行

軍門日夜商勸捐殷勤諮訪惟鄉官鄉官居本市廩近持
籌握算心能專大戶已空小戶盡藏匿難防孰能信別有
上策名抽釐設局鉤稽得容隱紛紛盤詰勞關河銖分黍
取原非苛紆難底須家自毀謀身還道功偏多可憐剽掠
滿行路愁苦閭閻已莫訴堪更盤查關柵連來往何人敢
朝暮君不見鉅橋發粟周以昌臨安搜括宋乃亡盡除苛
政望當事權聲豈獨騰金闥

家雪亭枉索近詩題句答謝

平生嗜佳句敢望萬口傳
哀怨訴切切聊比彼寒蟬
江湖況滿地行路知益難
誰能雨風際獨見一星乾
側身此宇宙俯仰何繇寬
羨君守巖壑疏水亦得安
一詩感相貽諷詠懷脾肝

得楊子城雲陽書感寄

尺素江干已久沈
一緘深感故人心
挑燈不厭千回讀
可但家書抵萬金

幾行淡墨字敲傾
都是模糊淚點成
回首平生誰得似
始知患難有交情

趙漁吟金澤鄉人也以賣魚爲業性嗜酒得酒則爲

人畫菜筆墨閒雅有深致人皆呼爲趙菜不作畫
時衣蓑戴笠依然漁父此鄉一奇人也余以扇頭
乞畫作此酬之

平生嗜酒兼嗜菜寫菜常憑酒醉時莫道菜根人共斂此
中真味祇君知

終日磯頭伴釣徒得魚歸去酒誰沽興酣替寫田園景爲
圃爲漁任我呼

旅館題壁爲寓主人浦秋圃作

遭逢患難誰我憐流離遷徙經三年囊空那更有餘粟爨
虛已是常無煙江頭烽火尙如昨歎息全家欲何託逢君
慷慨讓宅居此誼於今不爲薄雨雲翻覆悲成風斯世豈

有臯伯通吁嗟乎如君何愧臯伯通只我白笑非梁鴻

楊靜山遺照爲令子陶三題

醇風豈難追令名貴各保親長苟人人犯亂世知少我自
患難罹感此每懷抱頗聞楊夫子鄉里共稱道出入孝弟
修訥敏言行好瞻卹先家庭有食不獨飽餘願兼濟物仁
愛及枯槁王政本人情務遠實始小世人好議論是非日
顛倒毋怪籩豆間默已干戈造誰司教化權曉諭奈不早
斯人雖云亡貽謀尙遠紹耿耿顯揚懷亦足薄俗矯安得
羣盜平人心徧滌澡選舉更變通潛幽重旌表遺像我幸
瞻私衷令憂悄

將之雲陽雪亭用杜集簡蘇侯韻作詩贈行依韻酬

之

避兵東西走兩腳真如蓬徒令顧家室汲汲三載中一語
不敢發君意感獨重贈詩厚相許豈獨閔我窮知我抱痼
疾有藥不得攻且教試飲酒塊磊消心胷慨然念諸將養
寇方成風但傳青海箭莫挂天山弓連烽尙楚北縻餉仍
江東何日金焦閒飛報賊壘空一片子敬甕得復還衰翁
凱歌定高唱此願知君同世人競予聖罔辨烏雌雄誰能
詢芻蕘筮易占擊蒙

仲夏白雲陽病歸幸得不死而秋已中矣甫能起坐
書此以志懷歸之感

觸熱赴雲陽舉目萬憂集二豎驟我欺神昏氣短怯人事

略不省性命視呼吸兒懋侍我行同帆挂岌岌中途潰兵
遭爭載肆奪劫幸免殞其手得復寓廬接醫藥痛質罄搜
質倒空篋呻吟牀席聞家人守環泣我豈多罪辜罹譴百
未十天故遣我還備受世檻桷暑徂秋漸深扶杖起顛踰
忽聞京江營一月正三捷蘇城得安居便擬理歸楫消息
或未真檢點姑行笈驚魂定何時夜夢尙多魘

將返吳門留別金澤諸子

人生重離別況此患難時誰堪冒鋒鏑南北紛驅馳自我
來金澤淹忽已一期傳烽尙遠近行路多危機深感里中
賢遇我如舊知問訊少暇日慰勞無虛詞或攜酒漿過或
持菽粟貽閱我遭禍亂憂我時寒飢此豈今人識庶幾古

人思所嗟我昏耄何德堪當茲兒懋更淺學追隨愧彌滋
就中骨肉愛海霞尤獨私藹堂里中望戟門亦經師二陸
溯淵源非徒託宗支買鄰必千萬舍此將何之獨念先人
廬未能棄如遺缺祭矧已久夢寤恆於斯得歸那弗歸言
之淚如縻西風起颯颯蛩響增淒淒明年儻重來定指秋
爲期

舟行過高墊湖遇雨投袁青士

蘭升

所居渡橋泊

晨發金澤鎮暮指高墊湖湖波望無際四面圍菰蒲時平
片帆挂瞬息臨姑蘇自從三城陷設卡紛衝途高墊亦險
要盤詰多勇夫橫行肆劫掠行李皆艱虞撤防雖此日竊
伺仍姦徒雨風況颯颯還毋乃身憂孤渡橋不數里煙樹橫

模糊中有幽人室嘯歌出菱蘆返櫂急尋訪塞漏愁褰砌
衣囊盡沾溼僮僕生怨呼主人歎何往叩門空踟躕人生
行路難豈必江海逾風波起咫尺荆棘生座隅安得寇氛
靖老死先人廬

寓鄰浦蘅薌隱於市人不知也皆以白鬢呼之獨與
余善風雨中相送至蘇感之而贈以詩

東鄰老兒號白鬢眼中不識詩與書一生任俠性未悔直
欲上與古人俱知我全家故園返欲留不留恨已晚爲道
蛟龍滿江湖未殊虎豹潛坻阪慨然仗劍送我行掀髯豪
氣猶從橫誰言世風日輕薄如君肝膽真堪傾

到家

辭家又兩載歸後轉悲吁牆壁蛛絲罨庭除草蔓蕪經旬
猶待掃一病未全蘇最是先祠拜腰肢尙欲扶

中秋寫感

佳節驚逢那得懽廿年爲客本無端亂中強說還家好病
後原知久坐難愁遣桂花香入幔懶將菱角味堆盤劇憐
京口樓頭月此夕何人更共看

雲陽感事

扶病赴雲陽風塵尙滿目紛紛烏雀羣爭栖已高木豈知
雨風狂日夜撼華屋秉穗已無遺那得恣攫肉我來不逢
人疇與話心曲徘徊大道旁往來看蹶軸揚鞭竟相過心
豈識傾覆礮聲殷如雷習聽了不覺仰天一長歎自向江

頭哭

黃泥壩招楊子城入舟話舊兼簡楊子安

一帆竟指黃泥壩招取楊生入舟坐相看同是思難餘各
話離蹤了難罷憶從倡議居南鄉不恤奔馳忘飢餓糧鉏
奮起爭田閒未必黃巾不可破建牙樹纛彼何爲別有奇
謀肯相借我行不用亦已矣忍淚吞聲起長謝同時草檄
憶子安與君投筆各誇詫景升兒子嗟何知懋兒亦借赴各村勸募
也許相隨共田舍往事追論已兩年重逢那弗頭顧訝君
聽礮響今依然堅城誰許偏師下

諫壁投劉伯純

同是青氈坐擁人相逢思難兩相親此情可但當時感別

後思量倍覺真

一日三秋苦爾思
臨風休怪寄書遲
略無好語憑君報
只恐開絨淚轉滋

一卷新詩出袖中
蓬窗展誦恨怱怱
年來蹤迹聊憑識
也抵連宵翦燭紅

烽息無時祇各傷
暫時相見總茫茫
明朝便擬揚帆去
載得離情又滿航

辛豐

乍可辛豐到怱怱
又曲阿尋常來往路
今日幾人過衰柳
棲鴉少枯槐繫馬多
榜人私說與昨夜此風波

毘陵過洲勇營有感

江頭烽火尙驚傳幾度經過此慨然睨劍更誰思短褐扣
輪惟是惜空拳三年零雨遲還戍萬戶淒涼急倒縣但免
澠池過一步底須借箸恨無權

冬日寫憂

病起踰五月腰腳尙未健出入需人扶客至畏相見差喜
鄉里疏杜門得自便作者冬至逢先祠藻蘋薦再拜頗覺
難呼兒代終獻缺祭痛客途到家又焉怨嗟嗟此藉盤於
我本何戀躑躅徒軍門迂儒世所賤觸忌乃罔知往事不
可諫幸免雖當時涕淚尙滿面引疾復未許知幾恨不先
徒令顧室家乞食窮鄉徧暑寒歎屢更烽火報仍鉅我罪
知何由輟轉荷天譴顧此衰病軀堪更迭遭變雨雪正欲

來飢寒那得遣仰天望江頭不絕憂如綫

得李雨人

承霖

學士書寄此奉唁

閒道書來驚喜頻江南江北尙風塵豈知涕淚開緘滿可
但流離各話真詩廢蓼莪悲此日歌傳杖杜待何人漢廷
正是思蕭傅鄭重他年報國身

輕裘肥馬日紛紛寂寞荒村獨有君鐵網正煩滄海護銀
魚休便碧山焚懽情一夕隨流水離思三年付斷雲拌得
西山採薇蕨青氈留取答殷勤

丙辰

新年漫詠

故園風景看依然門貼泥金字字鮮烽火漫天誰得管客

來只道賀新年

風雪連朝覺倍寒
藥爐茗椀當椒盤
病中心事愁中景
併入吟牋祇獨看

嚴子秋自金壇來訪贈句奉答

驚喜相逢患難餘
此身無恙轉欷歔
一生仕宦都成夢
是處田園好卜居
厝火積薪憂未已
乘風破浪願知虛
傳來一語還堪羨
閨閣吟聲尙繞廬

書子秋所題歸去來辭詩後

淵明負經濟非必無宦情
一賦歸去來浩然謝簪纓
此意良可思微祿彼徒營
君歸豈不早世難偏躬嬰
可憐邗江柳不作柴桑青
田園歎蕪沒書劍悲飄零
慨然寄懷抱嘯

傲猶平生誰謂千載上高風渺難衡風塵看今日莽莽何
時清反覆誦君詩涕淚沾余纓

風雨中有索逋客至無以應之作此解嘲

典質方愁到布衾無聊還爲一長吟雨風聲裏門誰叩敗
興何須租吏臨

春感

繁華不改舊承平誰遣春來百感生白屋雨風鳩獨喚朱
門簾幙燕同爭傳杯落日情何極燒燭深宵眼獨明試向
高樓西北望幾家臺榭未全傾

高資官軍失利中丞吉

爾杭阿

公殉難

宵傳賊犯高資營營中大將氣不生中丞聞報握刀起馳

救不復須平明履及室皇劍寢門一怒直欲吞鯢鯨賊聞
中丞至解圍倒旗幟中丞亟合營賊圍勢彌熾矢盡糧絕
三軍哀奪圍欲出天昏霾呼聲動地還如雷自忘重寄徇
小勇但輕一死何爲哉嗚呼中丞死已矣江北江南亂誰
弭諸將若盡如中丞安得寇氛尙若此

揚州復陷

鎮揚使者知爲誰森嚴號令真如雷大開軍門盛歌舞勸
捐日夜窮民財淫掠婦女復縱子民怨未已兵怨起江南
賊勢方滔天鉤結潛通祇一水須臾流血尸從橫城中城
外無哭聲使者竄身獨何所草閒猶得全餘生嚴譴旋聞
下丹詔百萬生靈已莫告安得明朝天怒同亟子欃槍

盡除埽

重至丹陽不見一人改權金沙作

舊日丹陽路重來不見人始知離亂後消息總難真勢豈黃巾散營空細柳詢金沙還一櫂祇自閑勞薪

金沙遇吳菊青

收勸

有贈並示丁小坡

士良

我未識君知君名向者藉藉誇張生

謂詠仙

嶙峋風骨邁流

俗非但下筆驚從橫英夷犯順紀辛丑殺氣高騰四明口

督師何人裕節愍慷慨知君誓同守君知衆寡勢莫當感

公知己恩難忘勸公報國忠自矢公真與城俱存亡如君

豈愧古豫讓何必漆身自悲愴我曾經過國士橋流水重

聽氣猶王今來相見金沙城推襟送抱如平生勒銘未拂

燕山壁磨盾仍隨細柳營太息丹陽遇兵潰行李倉皇識
何在芒屨徒步空復愁雲樹淒迷日昏晦丁君年少氣尙
豪開筵慰勞風蕭騷縱談時事聽拉雜酒酣拔劍歌聲高
可惜張生早黃土肝膽無繇共傾吐我今盡室悲流離再
見茫茫定何所驚傳賊勢方披猖聲聞擊柝此旁皇君看
肅肅銜蘆雁萬里雲羅祇各傷

聞溧水失守恩恩返樞

忽傳溧水陷聞信雜驚疑豈謂金陵戍全教白土移乘虛
因直入得聞或潛馳一權恩恩返危哉祇獨知

無錫夜泊

計程三日到風逆恨偏遲行客多驚色舟人有怨辭亂鴉

看不足歸燕欲何之今夜梁溪泊安眠尙未知

向帥退守丹陽蘇常皆震有遷徙者

王師十萬金陵圍羽書日夜江頭催更番報捷踰三載旌
旗胡忽丹陽回飛章告急旦復暮賊騎充斥從天來臣罪
萬死臣力竭勢孤尙恐蘇常危蘇常聞之大震動探報絡
繹飛黃埃富者遷徙貧者哭哭聲直上通雲雷自從高資
失險要東西一任驅狼豺若更龍潭被衝突全軍孤注將
何爲倉皇退守未全失整旅亟望旌重麾所恨中丞死傷
勇坐令勢失鋒交摧九華山頭一同望陣雲莽莽猶深埋

句容復陷

乍聞溧水失又報句容陷句容指丹陽計程百里欠金壇

亦相鄰直下懷窺閼地皆逼毘陵一水通激盪危哉常州
城防截孰知念我昔募洲勇駐此衆未厭忠義誓各懷教
戒自忘僭汪趙皆指紳我賤豈足忝汪今雖云亡趙在意
難淹一旅可復興焉必萬夫兼殺氣方高騰兵刃邛容斂
燒燭夜頻看耿耿縣腰劍

曹二香自上海來卽之金沙

我從金沙歸君向金沙去紀時五月望問訊了無據送君
甫十日報警忽恩遽舊時絃誦鄉今作戎車路厯厯津亭
聞徧布公超霧君到將何爲返櫂儻朝暮起視雲中鷗跼
跼墮無數憂疑夢得安傳聞冀或誤踰月君不來愁更斷
尺素消息知漸真無翼飛難埒蘇城紛遷徙我亦日驚怖

同官二十年曷嘗異親故何意烽火罹身家兩莫顧真如
喪家狗未比守株兔莽莽悲風塵仰天更誰訴

不雨

不雨經三月揚沙欲滿城可堪兵亂後復見旱災成米價
愁頻問烽煙報屢驚最憂河水涸舟楫斷行程

城中聞警俱徙袁青士知余貲罄放舟來迂感而紀

此並寄胡海霞

壇溧皆告危陽常日傳警擊柝聞蘇臺昏慘迫朝景潛伏
湖廣匪煽亂久思避殺人漸市中出入挾霜鋌遷徙暮復
朝倉皇各悲哽嗟余囊久空那得行李整水涸沉城河埵
載無一艇深感胡與袁馳書切警省袁居接葑溪稍近易

合併放舟亟相逐流涕滿頤顙呼兒率婦孫先我就舴艋
魂夢已得安短燭且宵秉朋友豈不貴急難恃同拯兩君
具俠腸朱郭古應並懋兒得與游邀福實深幸卻望渡橋
雲切切自延頌

渡橋投袁青士

紀時夏六月二十日有五放舟赴渡橋怒颿忽前阻兩日
始得達行路豈不苦君聞亟遠迎赤日正當午此感可復
言默喻但肺腑路雖近葑溪僻猶勝城府若幸丹陽保蘇
常獲安堵故里許重還灑埽先人廡君來定懽然厚誼自
終古清泉聽泠泠垂楊撫縷縷三宿非空桑一生本逆旅
翦燭且今宵高談忘悲懽

又簡青士

機槍朗以斗邊縣閒望空庭各黯然且食蛤蜊知許事得
分齋菜總前緣遼東阜帽人誰識杜曲長鑣世共傳但使
琴書安一室未應便棄舊青氈

望雨

盡日東風一雨慳誰將枯淚灑田閒彼蒼應識民生苦祇
有農夫不肯閒
空聽朝朝屏水聲脂膏已竭痛民生何人手把經綸挽不
使雲雷萬里行
莫問箕星與畢星幾會風雨到空庭蛟龍只管深潭卧一
任哀祈總不靈

但見原田長草萊更無涓滴助瓶罍若爲霖雨兼舟楫要
望商家傳說來

驚聞金壇被圍有懷城中諸友

見說金壇縣紅頭一夕來溝濠堪涸竭城堞豈崔嵬制梃
思田里量沙望將材蒼生吾敢問獨爲故人哀

連日得雨不及一寸

昨夜前村報得雨三點兩點奈何許朝來急上高樓望薄
雲尙見同空宇須臾吹散又東風旭日依舊當天紅老農
日向田閒哭戽水水涸勞成空遷流已極兵戎害彼蒼豈
亦忘仁愛昏黃浙瀝聞簷端甘霖或者崇朝沛關心時節
過立秋荒成終爲蒼生憂

胡海霞書來招同懋兒至斜塘看寓

斜塘接金澤西去廿里餘言可一水達中有隱者居門前
繞流水四面環桑榆市遠客來少亦不愁無魚雖只三楹
屋差可安琴書橫流正滄海得免託牛車此意重感激焉
用生躊躇兒行且相報涕淚全家俱

留別袁青士

綠楊暫作隔牆鄰欲折柔條倍愴神他日寫來圖畫裏兩
家人作一家人

移寓斜塘中途遇雨胡海霞留宿一夕

扁舟發渡橋欲去未忍去西南風打頭意若默我喻推篷
看湖波鷺浴何閒豫兩岸聞歎聲禾槁更安語立秋過十

日暴厄亦奚據我命嗟遭迤急雨此偏遇幸早抵金澤故
人話絮絮塞漏呼鬟鬟僮僕起恩遽遷徙經四年無多本
家具尙餘未鬻書沾濡料豈預甌破顧何益翦燭且待曙
卸帆一炊時回首自歎歎

寓齋遣悶

小橋流水自西東門對斜陽曲曲通若是太平無事日此
閒儘可駐游騁

幾曾伴侶結樵漁到處浮家願本虛可但詩成時有識悔
題楹額卽吾廬

南北驅馳祇自傷一生蹤迹太茫茫魏塘卜築思前事今

日何人識沈郎

嘉善沈鶴沙會約結鄰此卽嘉善地也

全家暫此避風塵莫道團圓樂便真總望敝廬無恙在子
孫永守識先人

攜李訪沈廉仲不值

一自江頭別相望思不禁寄書知未達有夢恨難尋曾否
瀧阡表空爲梁父吟定知採藥去莫便入山深

杭州道中雜詠

牽夫赤腳水中行觸石挖泥路不平何處秧歌還入耳終
宵只聽踏車聲

兩日方教新市過近來絲價問如何蠶桑原道今年好只
怕抽捐折本多

蘇州南去接杭嘉來往船多趁日斜經過幾亭更幾墩不

知何處有盤查

道路誰知世變遷
買絲抱布自年年
相逢卻說杭州好
不使蘇州當十錢

繫纜船家酒自沽
相逢橋畔遇樵夫
不知世有干戈事
只問蘇州水淺無

塘栖屈曲指餘杭
阿妹思兄定不忘
怙悵客囊羞澀甚
但憑夜夢話倉皇

武林訪葉青原觀察

同是曾經患難人
重逢那弗一沾巾
卽看今日油幢擁
可憶當時燈火親
問絹胡威原早識
陳書賈誼竟何因
流離未定身
先老再見他年事
豈真

與葉香溪

柑齋

夜話卽以留別

卅年不見恨漫漫亂後重逢強自懽
往事共論真若夢離情欲訴苦無端
隻身靡定歸何有八口誰依死亦難
此日羨君惟一事眼明先我早辭官

宦蹟誰思古廩邱一錢選得至今留
本無南郭吹竽願儘許西湖載酒游
喪亂頻經君亦老飢寒難免我方憂
明朝一櫂江頭返贏得相思滿客舟

得里中親舊書

潮人習械鬪乘亂潛蘇城殺人視螻蟻
搶掠時從橫大府不敢禁癰患知終成
容湫況新陷消息方同驚忽聞郡守
薛驅馬來華亭威名夙自負訶伺誇
微行揮刀突午夜督

捕驚雷霆巨魁既逃匿餘黨皆誅黥時正中秋節皓月當天明閭閻起爭賀置酒歡同生寄書感親舊馳報無留停上言敝廬在下言道路平胡弗整歸櫂誰能俟時清我意豈不爾念此涕頻傾遷徙已十二貲竭愁津程奮飛少長翻仰望空蒼冥

沈廉仲自嘉定來卽別

暮靄橫空冥炊煙上墟里胡來剝啄聲披衣姑徐起開門始知君握手雜悲喜君歸自膠城迂道此至止問我喪亂遭於此幾遷徙我欲爲君訴不知語所始請看天上雲浮蕩那可擬又如江頭萍飄流識何底得失本雞蟲死生亦螻蟻所嗟水火中民命救何以我但憂一身此念知可恥

君家先司空生平感知已相期負深慙逢君自隕涕君兄
官京師君居保桑梓願各振家聲青史姓名紀毋徒逐時
賢蒿目忽瑣尾此言質重泉或未先公鄙若云一日長覲
顏實倍蕤談深宵已闌秋蛩助歔歔送君歸扁舟離情動
河湓

憫蝗

江南本無蝗鄉民每不識何自來田閒但欲稻頭食可憐
今年夏寸雨望不得戽水聚老稚日夜少休息筋骨歎曲
蹠肌膚痛焦黑視此半枯稻都是農夫力登場堪尙遲轉
盼盡螟螣告訴苦無門飢腸自煎迫念昔乾隆中此災盛
南北相傳桂林公

陳文恭宏謀

撫吳動憫惻檄捕督有司勤惰

紀冊籍稽古備諸法焚瘞徧阡陌往來城鄉聞真若已飢
溺毋怪憩棠陰至今感遺澤烽煙今未銷民食若復竭死
亡正難知四望欲何適

憂來

一室病未已余亦苦不支愈痛少陳檄驅瘡無韓詩道梗
藥物廢年荒柴米思西風動瑟瑟憂來欲誰知

將之玉峰家研深約先至其家坐令子實甫試船去
時兒孫輩已留實甫寓

預恐乘風便揚帆直過門卻教攜襪被先與泝黃昏離思
烹茶話家常翦燭論感君三載意愛我及兒孫

玉峰寓感

無端十日此逡巡卅載還留未了因城郭依然風景換重
來非復舊時人

漏鼓頻聽試院催白袍門外感徘徊莫疑此客渾難識也
是東塗西抹來

舊恨新愁一夕併思量往事總傷情笛聲忍更山陽聽白
髮相催我自驚

流浪江湖淚暗吞賣書鬻硯自朝昏青氈差幸還留得又
看名場逐幼孫

遇顧蘭屋甥話舊

秦淮一別兩模糊卅載重逢話得無世事共愁棋局變名
心休恨燭光孤談經室靜雲窺岫修史亭高月射湖祇恐

風塵猶莽莽聞鷗未許逐驚鳥

張芑塘

運豐

枉過

四十年前事君來話未忘驚看俱白髮愁問獨青箱時局
浮沈悟人情冷暖嘗知君心澹泊羞逐少年場

由玉峰至蘇將赴斜塘移家旋里

三月辭家計未疏入門滿眼已欷歔蠨蛸在戶伊威室先
與庭前惡草除

高樓依舊帶斜暉那有依人燕子飛眞箇到家仍是客明
朝便擬一帆歸

楊子城書來以諸生貢舉之資將爲大營移作軍餉
欲余求援於學使者因重至玉峰

鎮江讓賊居相持踰三載糜餉知幾何窮黎痛飢餒堪此
養士資復欲兵食改呼叫徧諸生傳聞實可駭金玉等泥
沙血肉盡稻蟹彼蒼豈夢夢上訴應真宰我忝師儒居忍
看章縫殆省書紛涕漣挂帆敢稍待監門世豈無杜牧言
何罪

喜袁青士游庠作詩以賀

青士負雋才尺蠖久知屈今來得梟盧聲譽起蓬華世情
安足論蟲雞笑得失自我居君家知君先名實內行敦古
人孝弟自一室疏水甘平居衣冠務樸質暇時誦遺書目
光炯前哲上爲廊廟資下作閭閻律願君堅初心紛華慎
毋悅宣室思陳書草廬可抱膝出處待重論時清望何日

贈虞山王寶芝

振聲

孝廉

旅館無人過逢君得暫親相看多道氣太息獨風塵入世
心偏苦憂時語自真如何明眼客曾未見興薪

復自斜塘挈家旋里

浩然鼓楫還故鄉卻望湖水心茫茫此行計日最爲短已
是隔宿無餘糧糧盡途窮欲誰訴死生只合彼蒼付但望
得過此荒年幸免溝壑豈非數我思獻策京江營日夜痛
哭心憂驚遭讒觸忌幾戮辱得歸且自全餘生吁嗟乎遭
讒觸忌留餘生性命真已鴻毛輕何必驚波駭浪爲此僕
僕江頭行

寄邵子顯

青春自負言利
名一四
三
昨者還鄉未解橐入門先見米一斛亟問東鄰寄者誰但
言來自婁江曲心知此必我故人念我栖栖或枵腹致此
聊供朝夕炊重索來書不盈幅相思都在無言中何以報
之盡一哭知君生計今亦艱家居況久無閒祿解衣推食
猶當年世有其人豈非福整冠肅帶且臨風敢弗敬拜仁
人粟

方雲壑

其洪

曾以冬至寫懷詩見寄遲未奉和今歲

將闌寄此以誌疏懶之愆

兵戈叢裏閔驅馳感激相逢涕淚滋意氣獨於今日見性
情還令古人思仲宣作客聊成賦子美憂時祇詠詩慙愧
報書遲一月紛紛雨雪歲驚辭

簡沈玉生

親故都非昔相憐獨有君
雨風時過從裘馬任紛紜
學道心知負謀生計苦殷
兩看頭白盡何以慰離羣

三才集卷一

三

意若山館詩稿卷十四終

孫潤庠曾孫家振校字